

Na osnovu člana 84. stav (6) i (7) i 102. stav (1) tačka a) Zakona o uređenju saobraćaja na području Kantona Sarajevo ("Službene novine Kantona Sarajevo", broj 30/17 i 46/17) i člana 26. i 28. stav (1) Zakona o Vladi Kantona Sarajevo ("Službene novine Kantona Sarajevo", broj 36/14 - Novi prečišćeni tekst i 37/14 - Ispravka), Vlada Kantona Sarajevo je, na 158. sjednici održanoj 13.12.2018. godine, donijela

UREDBU

O ORGANIZACIJI PARKIRANJA, JAVNIM PARKING POVRŠINAMA, PARKING ZONAMA, IZGRADNJI NOVIH PARKINGA I ORGANIZACIJI JEDINSTVENOG SISTEMA NAPLATE PARKIRANJA

POGLAVLJE I - OSNOVNE ODREDBE

Član 1. (Predmet Uredbe)

Ovom uredbom uređuju se:

- a) javne površine namijenjene isključivo za parkiranje motornih vozila,
- b) parking zone,
- c) vrste parking karata i način njihovog korištenja,
- d) uslovi za sticanje i korištenje povlaštene parking karte,
- e) organizacija jedinstvenog sistema naplate parkiranja,
- f) uplata i raspodjela prihoda od javnih parkinga,
- g) modaliteti finansiranja izgradnje novih parkinga i garaža,
- h) kontrola parkiranja na javnim parkinzima,
- i) nadzor.

Član 2. (Značenje pojmova)

Izrazi koji se koriste u ovoj uredbi imaju sljedeće značenje:

- a) davalac komunalne usluge - pravne ili fizičke osobe koje organizuju rad, obavljaju naplatu i kontrolu nad parkira- njem vozila u skladu sa ovom uredbom,
- b) javna garaža - građevinski objekat namijenjen parkiranju vozila koji može biti izveden kao

nadzemni ili podzemni ili kao nadzemno-podzemni objekat,

c) javni parking s naplatom (u daljem tekstu: parking sa naplatom), a koji je u nadležnosti Ministarstva - uređena i propisno označena ulična ili izdvojena površina na kojoj je uvedena naplata parkiranja i koja je označena odgovarajućom saobraćajnom signalizacijom te informacijom o parking zoni, cijenama parkiranja ovisno o vremenu parkiranja kao i načinu plaćanja parkiranja,

d) javni parking u privatnom vlasništvu - uređena i propisno označena izdvojena površina na parceli ili u objektu u vlasništvu pravne ili fizičke osobe i koja je označena odgovarajućom saobraćajnom signalizacijom i opremom,

e) kontrolor parkiranja davaoca komunalne usluge - kvalifikovani zaposlenik pravne osobe sa javnim ovlaštenjem (u daljem tekstu: kontrolor),

f) korisnik javnog parkinga (u daljnjem tekstu: korisnik) - vozač koji parkira vozilo na parking mjesto, odnosno drugo lice za koje je ovom uredbom određeno da se smatra korisnikom,

g) Ministarstvo saobraćaja Kantona Sarajevo (u daljem tekstu Ministarstvo) - prati stanje mirujućeg saobraćaja, provodi mjere poboljšanja i uspostavlja jedinstven sistem parkiranja,

h) parking mjesto - dio javne parking površine namijenjeno parkiranju jednog motornog vozila i označeno odgovarajućom saobraćajnom signalizacijom,

i) parking zona - javna parking površina na kojoj se vrši naplata parkiranja,

j) rezervisano parking mjesto - parking mjesto koje odobrava Ministarstvo, namijenjeno određenom korisniku i označeno odgovarajućom saobraćajnom signalizacijom,

k) vozilo na parking mjestu - osobni automobil i drugo motorno vozilo namijenjeno za prijevoz lica, koji osim sjedišta za vozača ima najviše osam sjedišta i čija dopuštena masa ne prelazi 3.500 kg i dimenzije odgovaraju propisanim dimenzijama parking mjesta osobnog automobila,

l) ostala motorna vozila na parking mjestu - teretna vozila preko 3500 kg, autobusi i minibusi,

m) privremeni javni parkinzi su parkinzi koji se otvaraju zbog održavanja raznih skupova i manifestacija sportskog, kulturnog, političkog i dr. karaktera okupljanja,

n) doplatna parking karta - novčani iznos koji se plaća prilikom deblokade vozila za učinjeni prekršaj.

Član 3. (Zaključivanje Ugovora)

(1) Ako ovom uredbom nije drugačije određeno, parkiranjem vozila na javnoj parking površini korisnik zaključuje ugovor o korištenju javne parking površine, sa davaocem komunalne usluge, prihvatajući uvjete propisane ovom uredbom.

(2) Ugovorom iz st. (1) ovog člana isključuje se čuvanje vozila te odgovornost za nestanak, uništenje ili oštećenje vozila, osim ako ovom uredbom nije drugačije propisano.

Član 4. (Korisnik vozila)

(1) Korisnikom se smatra vlasnik vozila koji je evidentiran u odgovarajućim evidencijama Ministarstva unutrašnjih poslova ili druge nadležne institucije prema registarskim oznakama vozila.

(2) Korisnikom se smatra i primalac leasinga kojem je vozilo dato na korištenje na temelju pravnog posla leasinga, odnosno zakupac kojem je lice koje obavlja registrovanu djelatnost rent-a-car usluge vozilo dato na korištenje na temelju ugovora o zakupu.

POGLAVLJE II - NADLEŽNOST, ORGANIZACIJA I NAČIN NAPLATE PARKIRANJA

Odjeljak A - Utvrđivanje jedinstvenog sistema javnog parkiranja

Član 5. (Nadležnost Ministarstva)

(1) Ministarstvo je nadležno za provođenje jedinstvenog sistema javnog parkiranja na području Kantona Sarajevo (u daljem tekstu: Kanton).

(2) U smislu st. (1) ovog člana Ministarstvo je nadležno za:

- a) planiranje, organizaciju i unapređenje javnog parkiranja u Kantonu,
- b) upravljanje i nadzor nad funkcionisanjem javnih parkinga na području Kantona,
- c) zaključivanje ugovora o pružanju komunalne usluge - parkiranja sa davaocem komunalne usluge,
- d) otvaranje novih parkinga,
- e) uspostavljanje jedinstvenog sistema naplate parkiranja,
- f) postavljanje info tačaka za prikaz slobodnih parking mjesta,
- g) saobraćajna signalizacija na parkinzima.

(3) Ministarstvo je dužno osigurati svu parkirališnu opremu i izdvajati sredstva za održavanje javnih parking površina u nadležnosti Ministarstva.

Član 6. (Planiranje, organizacija i unapređenje javnog parkiranja)

(1) Ministarstvo najkasnije do 31. marta tekuće godine donosi godišnji plan investicija u skladu sa raspoloživim budžetskim i namjenski prikupljenim sredstvima za unapređenje javnih parkinga.

(2) Izuzetno Ministarstvo može sufinansirati izgradnju i unapređenje parkinga na zahtjev drugih zainteresovanih subjekata.

(3) Parkiranje vozila i naplata parkiranja organizira se na:

a) javnim parkinzima,

b) javnim garažama,

c) rezervisanim parking mjestima,

d) javnim parkinzima i garažama u privatnom vlasništvu.

(4) Unapređenje javnog parkiranja podrazumijeva tehnološko ulaganje u razvoj sistema naplate, kontrole naplate, obnavljanje signalizacije, te obilježavanje novih javnih parkinga.

Član 7. (Upravljanje i nadzor nad funkcionisanjem javnih parkinga na području Kantona)

Upravljanje i nadzor nad javnim parkinzima sa naplatom podrazumijeva vođenje evidencije o svim javnim parkinzima u Kantonu i on-line nadziranje naplate i kontrole naplate parkiranja putem posebnog softvera.

Član 8. (Otvaranje novih parkinga)

(1) Ministarstvo po službenoj dužnosti donosi rješenje za otvaranje novih uličnih i posebno izdvojenih parkinga sa naplatom na području Kantona.

(2) Rješenje iz st. (1) ovog člana donosi se na osnovu konsultacija sa općinom na čijoj se teritoriji otvara parking ili sa KJU za zaštićena prirodna područja.

(3) Nove lokacije za otvaranje parkinga za osobne automobile, teretna motorna vozila i autobuse utvrđuje Ministarstvo Planom rada i investiranja.

(4) Plan iz st. (3) ovog člana donosi se u skladu sa važećim prostorno-planskim dokumentima.

(5) Izuzetno od odredbi st. (3) ovog člana, ukoliko prostorno-planski dokumenti nisu doneseni ili na istim nisu predviđene javne površine za parkiranje, Plan se donosi na osnovu stručnog mišljenja Zavoda za planiranje razvoja Kantona Sarajevo.

(6) Ministarstvo na zahtjev općine izdaje saglasnost za uspostavu parkinga sa ili bez naplate, a koji će služiti za parkiranje stanara.

(7) Općina može povjeriti uz saglasnost Ministarstva uređenu javnu površinu čiji je vlasnik, trećem licu na upravljanje, a sve u skladu sa članom 20. ove uredbe.

Član 9. (Uspostavljanje jedinstvenog sistema naplate parkiranja)

(1) Ministarstvo uspostavlja jedinstven sistem parkiranja utvrđivanjem cijena parkiranja, naplate i kontrole naplate parkiranja.

(2) Ministarstvo rješenjem utvrđuje lokaciju, jedinstven izgled, visinu naknade za iznamljivanje prostora na info tački za prikaz slobodnih parking mjesta.

(3) Novčana sredstva iz st. (2) ovog člana su namjenski prihod Ministarstva i koristit će se za modernizaciju i unapređenje cjelokupnog saobraćaja u mirovanju te infrastrukturno uvezivanje u jedinstven sistem parkiranja na području Kantona.

Član 10. (Saobraćajna signalizacija na parkinzima)

Ministarstvo putem namjenskih sredstava vrši održavanje i obnovu saobraćajne signalizacije na javnim parkinzima kao i postavljanje nove signalizacije prema Pravilniku o saobraćajnim znakovima i signalizaciji na cestama, načinu obilježavanja radova i prepreka na cesti i znakovima koje učesnicima u saobraćaju daje ovlašteno lice ("Službeni glasnik BiH", br. 16/07 - u daljem tekstu: Pravilnik o saobraćajnim znakovima).

Član 11. (Parkinzi u zaštićenim područjima)

Prava i obaveze vezane za javne parkinge koji se nalaze u zaštićenim prirodnim područjima biti će definisani kroz Sporazum koji će Ministarstvo zaključiti sa KJU za zaštićena prirodna područja Kantona Sarajevo. Rok za potpisivanje sporazuma je 30 dana od dana usvajanja ove uredbe.

Član 12. (Obaveze davaoca komunalne usluge)

(1) Naplatu, kontrolu naplate parkiranja i druge prateće aktivnosti vrši davalac komunalne usluge kojeg odredi Ministarstvo.

(2) Obaveze davaoca komunalne usluge su:

a) organiziranje procesa pružanja usluge: naplata, kontrola naplate parkiranja i redovno aktiviranje parkomata iz stanja mirovanja.

b) zimsko i ljetno održavanje parking površina,

c) redovno čišćenje parkomata i opreme od snijega, leda, prašine,

d) uklanjanje nepropisno postavljenih znakova i fizičkih prepreka (pokretnih ili nepokretnih) sa parkinga koji ometaju funkcionalnost i redovno parkiranje korisnika parkinga, a uz nalog Ministarstva.

(3) Davalac komunalne usluge dužan je do 10-tog u mjesecu podnijeti izvještaj Ministarstvu o pruženim komunalnim uslugama iz st. (2) ovog člana za prethodni mjesec.

(4) Sadržaj izvještaja iz st. (3) ovog člana davalac komunalne usluge će detaljnije usaglasiti sa Ministarstvom.

(5) Ministarstvo će definirati standard pružanja komunalne usluge od strane davaoca komunalne usluge na osnovu kojih će cijeliti stepen ispunjenosti obaveza davaoca komunalne usluge na mjesečnom nivou.

(6) Ukoliko ocijeni da pružena usluga od strane davaoca komunalne usluge ne odgovara utvrđenom standardu, Ministarstvo može:

a) smanjiti iznos naknade prema davaocu komunalne usluge srazmjerno stepenu neispunjenja standarda pružanja usluge;

b) raskinuti ugovor sa davaocem komunalne usluge za ponovljene teže propuste u ispunjavanju komunalne usluge.

Odjeljak B - Parkiranje na javnim parkinzima

Član 13. (Vrste javnih parkinga)

(1) Javni parkinzi mogu biti stalni, privremeni, ulični i izvanulični.

(2) Stalni javni parkinzi su parkinzi na kojima se parkiranje naplaćuje tokom cijele kalendarske godine.

(3) Privremeni javni parkinzi su parkinzi koji se otvaraju zbog održavanja raznih skupova i manifestacija sportskog, kulturnog, političkog i dr. karaktera okupljanja.

(4) Ulični javni parkinzi su parkinzi na ulici i trotoaru po odobrenju Ministarstva, posebno označeni horizontalnom i vertikalnom saobraćajnom signalizacijom u skladu s propisima o sigurnosti saobraćaja te tehničkom dokumentacijom.

(5) Izvanulični javni parkinzi su parkinzi koji se nalaze izvan ceste, a označeni su vertikalnom i horizontalnom saobraćajnom signalizacijom u skladu s ovom uredbom i prostorno su definisani posebnim projektom.

(6) Parking mjesto na asfaltiranim javnim parkinzima označava se saobraćajnom signalizacijom koja je u skladu sa Zakonom o osnovama sigurnosti saobraćaja na putevima u Bosni i Hercegovini ("Službeni glasnik BiH", br. 6/06; 75/06; 44/07; 84/09; 48/10 i 18/13) i Pravilnikom o saobraćajnim znakovima ("Službeni glasnik BiH", br. 16/07).

(7) Javni parkinzi u smislu ove uredbe smatraju se i posebni prostori namijenjeni za parkiranje teretnih vozila i autobusa, čije lokacije su određene elaboratom izrađenim od nadležne institucije u saradnji sa jedinicama lokalne samouprave i uz saglasnost Ministarstva.

(8) Javni parkinzi u smislu ove uredbe smatraju se i posebni prostori namijenjeni za parkiranje autobusa, čije lokacije su određene uz saglasnost Ministarstva (hoteli, moteli, vrtići i osnovne škole).

(9) Javni parkinzi u smislu ove uredbe ne smatraju se posebni prostori za parkiranje putničkih motornih vozila koji pripadaju određenom objektu (poslovni ili stambeni objekat i dr.) kao i prostori određeni za parkiranje određene vrste vozila (taksi stajališta).

Član 14. (Obilježavanje javnog parkinga)

Javni parkinzi minimalno moraju imati saobraćajnu signalizaciju sa oznakom parking zone, vremena naplate parkiranja i cijene parking karte.

Član 15. (Parking za osobe sa invaliditetom)

(1) Na javnim parkinzima sa naplatom na posebno obilježenim mjestima rezervisanim za parkiranje vozila osoba sa invaliditetom, osobe sa invaliditetom koje na vozilu imaju istaknut važeći međunarodni znak pristupačnosti, imaju pravo parkirati bez plaćanja naknade najduže tri sata, nakon čega podliježu obavezi plaćanja parking karte u skladu sa ovom uredbom.

(2) Ukoliko osobe s invaliditetom vozilo sa međunarodnim znakom pristupačnosti parkiraju na parking mjestu sa naplatom koja nisu predviđena i obilježena za invalide, dužni su platiti naknadu koja je predviđena ovom uredbom.

(3) Broj i raspored obilježenih parking mjesta za osobe sa invaliditetom određuje Ministarstvo za svaki pojedinačni ulični javni parking u omjeru do 5% od ukupnog broja svih parking mjesta.

(4) Za obilježavanje parking mjesta za osobe sa invaliditetom na mjestima gdje nije obilježen javni parking uz naplatu, nadležna općina pribavlja saglasnost Ministarstva.

(5) Organizatori javnih, kulturnih i sportskih manifestacija dužni su obezbijediti parking mjesta osobama sa invaliditetom najbliže mjestu održavanja manifestacije.

(6) Osobe sa invaliditetom koje posjeduju važeći znak pristupačnosti mogu parkirati na parkinzima koji su pod rampom, na kojim postoje obilježena parking mjesta za osobe sa invaliditetom i ukoliko je na ulazu u parking postavljena signalizacija koja ukazuje na mogućnost parkiranja invalidnih lica na posebno označenim parking mjestima.

(7) Parkiranje propisano stavom (6) ovog člana invalidno lice može koristiti besplatno najduže tri sata, nakon čega podliježe naknadama u skladu sa ovom uredbom.

Član 16. (Zabrane)

(1) Na javnim parkinzima sa naplatom zabranjeno je:

a) zauzimanje parking mjesta putem ograđivanja (rampe, ograde, i razni predmeti koji fizički

ometaju parkiranje),

b) neovlašteno zaustavljanje i parkiranje na rezervisanim parking mjestima,

c) neovlašteno zaustavljanje i parkiranje na označenim parking mjestima za osobe sa invaliditetom bez važećeg znaka pristupačnosti,

d) korištenje parking mjesta označenog za osobe sa invaliditetom neprekidno duže od tri sata od strane osobe koja posjeduje važeći znak pristupačnosti,

e) plakatiranje, crtanje i pisanje grafita na parkirališnoj opremi i saobraćajnoj signalizaciji na parkinzima.

(2) Za učinjeni prekršaj iz st. 1. tač. (a), (b), (c) i (d) ovog člana, vozilo korisnika parkinga bit će uklonjeno specijalnim vozilom "pauk".

Odjeljak C- Parkiranje u javnim garažama

Član 17. (Javne garaže - garažiranje vozila)

(1) Parkiranje i garažiranje u javnim garažama organizovano je i naplaćuje se tokom cijele kalendarske godine od strane davaoca komunalne usluge.

(2) Dodjela garažnog parking mjesta se vrši na osnovu ugovora na određeni i neodređeni vremenski period prema utvrđenim cijenama iz Zaključka o cijenama parking karte.

(3) Način naplate garažiranja i parkiranja, cijene parkirnih i garažnih parking karata i način njihovog korištenja u javnim garažama na prijedlog davaoca usluge usvaja Vlada Kantona Sarajevo (u daljem tekstu: Vlada), odnosno vlasnik javnih garaža u privatnom vlasništvu.

(4) Uslovi korištenja moraju biti vidljivo označeni na svakom ulazu i izlazu iz javne garaže.

(5) Ministarstvo može ulaganjem namjenskih sredstava kao i ulaganjem u saradnji sa Gradom Sarajevo i općinama graditi nove garaže, a što će se regulisati posebnim sporazumom.

Odjeljak D - Parkiranje na rezervisanim parking mjestima

Član 18. (Rezervisana parking mjesta)

(1) Ministarstvo po zahtjevu korisnika, rješenjem odobrava rezervaciju parking mjesta najmanje na mjesec dana, a najduže do kraja kalendarske godine.

(2) Rješenjem iz st. (1) ovog člana utvrđuju se uslovi korištenja rezervisanog parking mjesta.

(3) Iznimno, Ministarstvo će donijeti novo rješenje kojim će se korisniku osigurati drugo rezervisano parking mjesto u neposrednoj blizini, ako se prije isteka roka na koje je rješenje

doneseno izmijene saobraćajne okolnosti.

(4) Ministarstvo rješenjem može odobriti rezervaciju parking mjesta za kraći period od mjesec dana u slučaju održavanja manifestacija ili sl.

(5) Broj odobrenih rezervisanih parking mjesta u jednoj parking zoni može biti do 5% od ukupnog broja parking mjesta u toj parking zoni.

(6) Rezervisano parking mjesto obilježava se odgovarajućom signalizacijom i opremom od strane Ministarstva za parking mjesta za koja se plaća naknada, nakon uplate korisnika na žiro račun Ministarstva.

(7) Hoteli, moteli i drugi slični ugostiteljski objekti mogu izvršiti rezervaciju parking mjesta za parkiranje autobusa ukoliko postoje prostorne mogućnosti koje ne remete redovno odvijanje saobraćaja.

(8) Rezervacija parking mjesta kao i dodatno obilježavanje parking mjesta za osobe sa invaliditetom na parkinzima koji su pod naplatom, može se odobriti invalidnim osobama koje dostave rješenje o stepenu invalidnosti (I kategorije 100%) i kojima je odobrena tuđa njega.

(9) Naknada za korištenje rezervisanog parking mjesta iz (1) i (4) ovog člana uplaćuje se Ministarstvu, a visina naknade biće određena odlukom Vlade, na prijedlog Ministarstva.

Član 19. (Dodjeljivanje rezervisanih parking mjesta)

(1) Ministarstvo može rješenjem odobriti rezervaciju jednog parking mjesto bez naknade državnim institucijama, institucijama kantonalne vlasti, institucijama jedinica lokalne samouprave i vjerskim institucijama.

(2) Izuzetno, Ministarstvo može uz saglasnost Vlade, odobriti rezervaciju parking mjesta, bez novčane naknade isključivo za službena vozila drugih domaćih i stranih institucija.

(3) Rezervisano parking mjesto može se odobriti pravnim i fizičkim osobama uz propisanu novčanu naknadu.

(4) Ambasadama i konzulatima može se bez plaćanja naknade odobriti jedno rezervisano parking mjesto ili više parking mjesta na bazi reciprociteta na osnovu informacije Ministarstva vanjskih poslova Bosne i Hercegovine, dok se ostala parking mjesta mogu rezervisati uz propisanu novčanu naknadu.

(5) Rješenja iz st. (1), (2), (3) i (4) ovog člana Ministarstvo donosi za određeni vremenski period, a najviše za godinu dana, od dana izdavanja rješenja.

(6) Rezervisano parking mjesto obilježava se odgovarajućom signalizacijom i opremom propisanom rješenjem Ministarstva, o trošku Ministarstva kada se za parking mjesta uplaćuje naknada, a o trošku zakupca kada se za parking mjesta ne plaća naknada.

(7) Ustupanje na korištenje određenih parking mjesta bez novčane naknade za potrebe održavanja kulturnih, sportskih, političkih i drugih manifestacija odobrava Ministarstvo uz

saglasnost Vlade.

(8) Iznimno od st. (1) ovog člana Ministarstvo može ustupiti određeni broj parking mjesta uz novčanu naknadu prema cijenama predviđenim Zaključkom o cijenama parking karte.

(9) Ministarstvo može uz saglasnost Vlade odobriti rezervaciju parking mjesta i na parkinzima sa rampom bez naknade za vojne i civilne međunarodne misije.

Odjeljak E - Parkiranje na javnim parkinzima u privatnom vlasništvu

Član 20. (Privatni parkinzi i garaže)

(1) Privatni parking je uređena, asfaltirana i propisno označena izdvojena površina na parceli ili u objektu u vlasništvu pravnog ili fizičkog lica.

(2) Parking iz st. (1) ovog člana mora biti označen odgovarajućom vertikalnom i horizontalnom signalizacijom, u skladu sa Zakonom o uređenju saobraćaja ("Službene novine Kantona Sarajevo", br. 30/17 i 46/17) i Pravilnikom o saobraćajnim znakovima ("Službeni glasnik BiH", br. 16/07).

(3) Javna garaža u privatnom vlasništvu je objekat u kojem se na organiziran način parkiraju vozila, uz mogućnost plaćanja naknade za parkiranje.

(4) Parking i garaža iz st. (1) i (2) ovog člana, mogu se otvoriti u okviru objekta ili na zemljištu u privatnom vlasništvu za koje Ministarstvo izdaje saobraćajnu saglasnost u skladu sa odredbama Zakona o uređenju saobraćaja ("Službene novine Kantona Sarajevo", br. 30/17 i 46/17), Zakona o cestama ("Službene novine Federacije BiH", br. 12/10, 16/10 i 66/13), Zakona o prostornom uređenju Kantona Sarajevo ("Službene novine Kantona Sarajevo", br. 24/17) i za koje upravitelj cesta izdaje saglasnost za priključak na javnu cestu.

(5) Vlasnici privatnih parkinga i garaža mogu iznajmiti prostor na info tačkama za prikaz slobodnih parking mjesta koji se postavljaju na svim frekventnim raskrscima u Kantonu, a služit će za prikazivanje trenutno slobodnih parking mjesta.

(6) Prava i obaveze lica iz st. (5) ovog člana će se definisati posebnim ugovorom.

POGLAVLJE III - PARKING ZONE

Član 21. (Zone javnih parkinga)

(1) Javni parkinzi svrstavaju se u dvije parking zone.

(2) Zone su obilježene slijedećim bojama:

a) "I" zona je crvene boje,

b) "II" zona je žute boje,

c) "III" zona je plave boje.

(3) Vlada na prijedlog Ministarstva donosi Odluku o zonama javnih parkinga.

Član 22. (Radno vrijeme javnih parkinga)

(1) Radno vrijeme svih javnih parkinga je od 00-24 sata.

(2) Naplata parkiranja na javnim parkinzima se vrši po zonama:

a) u "I" zoni u vremenu od 07-22 sata, od ponedjeljak-subota,

b) u "II" zoni u vremenu od 07-20 sati, od ponedjeljak-subota,

c) u "III" zoni u vremenu od 07-20 sati, od ponedjeljak-subota.

(3) Na javnim parkinzima u "I", "II" i "III" zoni ne vrši se naplata nedjeljom, državnim praznicima i prvi dan vjerskih praznika.

(4) Naplata parkiranja na parkinzima sa automatskom naplatom (rampe) i garažama vrši se u periodu ponedjeljak-nedjelja od 00-24 sata.

(5) Vlada može donijeti odluku da se naplata na pojedinim uličnim parkinzima vrši 24 sata.

POGLAVLJE IV - VRSTE PARKING KARATA I NAČIN NJIHOVOG KORIŠTENJA

Član 23. (Parking karte)

(1) Za korištenje javnih parkinga i javnih garaža korisnik mora imati važeću parking kartu.

(2) Parking karta iz st. (1) ovog člana je karta koja je plaćena za:

a) parking zonu ili javnu garažu u kojoj se koristi usluga parkiranja,

b) vrijeme korištenja parkiranja, odnosno za razdoblje na koje je sklopljen ugovor o korištenju javne parking površine.

Član 24. (Forma parking karte)

(1) Parking karta se izdaje na papiru, u obliku naljepnice ili u drugoj formi.

(2) Parking karta se može izdati i kao potvrda u elektronskoj formi.

(3) Izrada i štampanje mjesečnih, polugodišnjih i godišnjih parking karata je u nadležnosti Ministarstva, ako ugovorom nije drugačije riješeno.

Član 25. (Vrste parking karata, prodaja i distribucija)

(1) Parking karta za parkiranje na javnom parkingu sa naplatom izdaje se kao satna, višesatna, dnevna, sedmična, mjesečna i polugodišnja.

(2) Za sklapanje ugovora o korištenju jednog parking mjesta na javnom parkingu sa naplatom u trajanju od jednog ili više sati izdaje se jednosatna ili višesatna parking karta.

(3) Dnevna parking karta za parkiranje na javnom parkingu sa naplatom izdaje se kao karta za određenu parking zonu i vrijedi u periodu naplate parkinga iz člana 22. st. (2) ove uredbe, a za tekući dan.

(4) Za sklapanje ugovora o korištenju jednog parking mjesta na javnom parkingu sa naplatom u periodu dužem od vremena naplate iz člana 22. st. (2) ove uredbe, u toku jednog dana, izdaje se sedmična, mjesečna i polugodišnja parking karta.

Član 26. (Sadržaj parking karte)

(1) Satna, višesatna, dnevna i sedmična parking karta sadrži: evidencijski broj parkomata, zonu, naziv ulice, datum i vrijeme uplate, vrijeme važenja i druge tehničke elemente po potrebi u svrhu unapređenja sistema.

(2) Povlaštena parking karta sadrži: grb Kantona Sarajevo, naziv Ministarstva, logo i naziv davaoca komunalne usluge, serijski broj, boju prema zoni parkiranja, godinu i mjesec na koji se odnosi, hologramsku zaštitu, suhi žig Ministarstva i druge elemente po potrebi u svrhu unapređenja sistema.

(3) Godišnja parking karta sadrži: grb Kantona Sarajevo, naziv Ministarstva, serijski broj, određenu boju, godinu na koju se odnosi, hologramsku zaštitu i druge elemente po potrebi u svrhu unapređenja sistema.

Član 27. (Način isticanja parking karte)

(1) Korisnik parkinga dužan je parking kartu kupljenu na parkomatu istaknuti na vidno mjesto sa unutrašnje strane prednjeg vjetrobranskog stakla.

(2) Korisnik javnog parkinga dužan je parking kartu kupiti u roku od 10 minuta od parkiranja vozila i propisno istaknuti na vozilo tako da kontrolor davaoca komunalne usluge može provjeriti njenu valjanost.

(3) Korisnik javnog parkinga dužan je izvršiti uplatu na jedan od ponuđenih načina plaćanja usluge parkiranja (parkomat, SMS, mobilna aplikacija, web aplikacija, na kiosku) u roku od 10 minuta od parkiranja vozila, tako da kontrolor davaoca komunalne usluge može provjeriti njenu valjanost.

(4) Ako korisnik javnog parkinga ne izvrši kupovinu parking karte iz st. (2) ovog člana ili je istakne tako da se ne može provjeriti njena valjanost, sankcionisat će se po odredbama ove uredbe.

(5) Parking karta je isprava kojom korisnik parkinga dokazuje da je platio odgovarajuću naknadu prema zoni parkiranja, te da se na parkingu zadržava u okviru dopuštenog vremena.

(6) Korisnik mjesečne, polugodišnje i godišnje parking karte obavezan je istu zalijepiti na vidno mjesto prednjeg vjetrobranskog stakla.

(7) Korisnici mjesečnih i polugodišnjih karata imat će mogućnost kupovine istih u elektronskoj formi, kad se za iste steknu uslovi.

Član 28. (Povreda ugovora o korištenju parkinga)

(1) Korisnik parkinga čini povredu ugovora o korištenju parkinga ukoliko:

a) ne kupi ili ne istakne parking kartu na vidljivo mjesto sa unutrašnje strane vjetrobranskog stakla vozila nakon parkiranja ili ne izvrši uplatu na jedan od ponuđenih načina plaćanja usluge parkiranja u roku od 10 minuta u skladu sa članom 27. st. (2) i (3) ove uredbe,

b) koristi parking kartu koja ne odgovara zoni parkiranja,

c) prekorači dopušteno vrijeme parkiranja više od 10 minuta.

d) korisnik parkiranja koristi povlaštenu parking kartu koja nije u skladu sa ovom uredbom,

e) svojim položajem parkiranja zauzima više od jednog parking mjesta.

(2) Ako korisnik parkiranja učini bilo koju navedenu radnju iz st. (1) ovog člana, sankcioniše se izdavanjem doplatne parking karte uz blokiranje vozila postavljanjem naprave za blokiranje točkova - kandže.

(3) Izdata doplatna karta uz postavljanje kandže odnosi se na prva dva sata od momenta izdavanja doplatne karte.

(4) Ukoliko korisnik ne izvrši uplatu doplatne parking karte za skidanje kandže u predviđenom periodu, korisnik parking mjesta sankcionisat će se odnošenjem vozila specijalnim vozilom "pauk".

Član 29. (Kupovina parking karte)

(1) Korisnik javnog parkinga može kupiti satnu, višesatnu, dnevnu i sedmičnu parking kartu na slijedeći način:

a) na parkomatu uz odgovarajuće kovanice u domaćoj valuti,

b) mobilnim telefonom, (sms porukom) ukucavanjem registarske oznake vozila i slanjem

poruke na namjenski broj označen na svakom parkomatu,

c) putem mobilne i web aplikacije,

d) bankovnom karticom na uređajima koji su predviđeni za ovakav vid naplate,

e) pretplatničkom karticom kupljenom na ovlaštenim prodajnim mjestima, te ubacivanjem na predviđenim mjestima na parkomatima,

f) na kioscima kada se za to steknu uslovi, a koji će biti posebno označeni za mogućnost kupovine.

(2) Naplata parking karte iz st. (1) ovog člana na parkomatu i kiosku podrazumijeva istovremeno plaćanje i preuzimanje parking karte.

(3) Naplata parking karte mobilnim telefonom putem sms-a podrazumijeva elektronsku kupovinu parking karte o čemu korisnik parkiranja prima povratnu sms poruku o plaćenju parking karti mobilnim telefonom kao i obavijest o isteku važenja parking karte.

(4) Naplata putem mobilne i web aplikacije podrazumijeva elektronsku kupovinu parking karte o čemu korisnik parkiranja prima obavijest o plaćenju parking karti putem navedene aplikacije.

(5) Naplata bankovnom karticom podrazumijeva plaćanje parkinga putem korištenja lične bankovne kartice i dobijanje parking karte na parkomatu.

(6) Naplata satne karte putem pretplatničke kartice kupljene na ovlaštenim prodajnim mjestima podrazumijeva istovremeno plaćanje i preuzimanje parking karte na parkomatu.

Član 30. (Garažna parking karta)

(1) Garažna parking karta izdaje se za parkiranje u određenoj javnoj garaži i to kao: satna, višesatna, dnevna, sedmična, mjesečna ili godišnja parking karta.

(2) Izgled i sadržaj garažnih parking karata za garaže koje su u privatnom vlasništvu određuje vlasnik garaže.

POGLAVLJE V - POVLAŠTENA PARKING KARTA

Član 31. (Povlaštena parking karta)

(1) Pravo na povlaštenu parking kartu imaju:

a) Fizička osoba (stanar) koja ima prebivalište ili boravište u ulici u kojoj postoji parking sa naplatom,

b) Pravna osoba koja ima sjedište ili koristi poslovni prostor u ulici u kojoj postoji parking sa

naplatom,

c) Fizička osoba koja obavlja samostalnu privrednu djelatnost koja ima sjedište ili koristi poslovni prostor u ulici u kojoj postoji parking sa naplatom,

d) Stanari ulica, fizičke i pravne osobe koje obavljaju samostalnu privrednu djelatnost u ulicama koje graniče sa ulicama u kojima postoji parking sa naplatom.

(2) Povlaštena parking karta vrijedi unutar parking zone u kojoj fizička osoba iz st. (1) tač. a) ovog člana ima prebivalište ili boravište, pravna osoba i fizička osoba koja obavlja samostalnu privrednu djelatnost iz st. (1) tač. b), c) i d) ovog člana ima sjedište ili koristi poslovni prostor.

(3) Odredbe ovog člana odnose se samo na ulične javne parkinge.

(4) Ministarstvo će posebnim rješenjima za parkinge sa rampom definisati uslove za povlašteno korištenje parking mjesta za stanare tokom noćnih sati.

Član 32. (Ostvarivanje prava na povlaštenu parking kartu)

(1) Osobe iz člana 31. st. (1) ove uredbe zahtjev za ostvarivanje prava na povlaštenu parking kartu podnose davaocu komunalne usluge.

(2) Fizičke osobe iz člana 31. st. (1) tač. a) i st. (2) ove uredbe uz zahtjev prilaže: cipsovu prijavu prebivališta/boravišta, ne stariju od šest mjeseci i ovjerenu fotokopiju vlasničke knjižice vozila ili ugovor o leasingu.

(3) Pravne osobe iz člana 31. st. (1) tač. b) i st. (2) ove uredbe uz zahtjev prilaže: ovjerenu fotokopiju prve stranice registracije preduzeća i ovjerenu fotokopiju vlasničke knjižice vozila ili ugovor o leasingu.

(4) Fizička osoba iz člana 31. st. (1) tač. c) i st. (2) ove uredbe uz zahtjev prilaže: ovjerenu fotokopiju rješenje o osnivanju samostalne privredne djelatnosti i ovjerenu fotokopiju vlasničke knjižice vozila ili ugovor o leasingu.

(5) Adresa vlasnika upisana u potvrdi o vlasništvu vozila mora biti identična adresi stanovanja u CIPS prijavi.

Član 33. (Godišnja parking karta)

(1) Pravo na godišnju parking kartu za službena vozila imaju: predsjedavajući, zamjenici predsjedavajućeg i sekretar Skupštine Kantona Sarajevo, premijer, ministri i sekretar Vlade, Protokol Vlade, Stručna službe za zajedničke poslove Kantona Sarajevo.

(2) Pravo na godišnju parking kartu za privatna vozila imaju: predsjedavajući, zamjenici predsjedavajućeg, zastupnici u Skupštini Kantona i sekretar Skupštine Kantona Sarajevo, premijer, ministri, sekretar Vlade i načelnik stručne službe za zajedničke poslove.

(3) Ministarstvo može u opravdanim slučajevima, izdati besplatnu godišnju parking kartu i drugim pravnim i fizičkim osobama.

(4) Ukupan broj izdatih godišnjih parking karata za kalendarsku godinu, a izdatih u skladu sa st. (1), (2) i (3) ne može preći 15% od ukupnog broja obilježenih uličnih javnih parkinga pod naplatom.

(5) Vozila iz st. (1), (2) i (3) ovog člana mogu se parkirati na svim uličnim parkinzima kojim upravlja Ministarstvo, osim na parkiralištima sa rampom.

Član 34. (Zamjena korištenja povlaštene parking karte)

(1) Ukoliko korisnik povlaštene parking karte za vrijeme njenog važenja promijeni vozilo za koje je karta izdata, davalac komunalne usluge će na zahtjev korisnika, izdati novu povlaštenu parking kartu sa rokom važenja prethodno izdate povlaštene parking karte.

(2) Prilikom podnošenja zahtjeva iz st. (1) ovog člana podnosilac zahtjeva prilaže ugovor o kupoprodaji vozila.

POGLAVLJE VI - CIJENA PARKIRANJA, UPLATA I KORIŠTENJE SREDSTAVA PRIKUPLJENIH OD PARKIRANJA VOZILA

Član 35. (Cijena parkiranja)

(1) Cijenu parking karte za pojedine parking zone, cijenu parking karte u javnim garažama i novčani iznos doplatnih parking karti, naknadu za odvoz vozilom "pauk" i usluge prikaza na info tačkama za pravne i fizičke osobe određuje odlukom Vlada, a na prijedlog Ministarstva.

(2) Odredbe st. (1) ovog člana ne odnose se na javne parkinge i garaže koji su u privatnom vlasništvu.

(3) Cijena pružanja usluga naplate i kontrole na javnim parkinzima kao i održavanje javnih parkinga pod rampama od strane davaoca komunalne usluge, utvrdit će se u skladu sa Zakonom o komunalnim djelatnostima ("Službene novine Kantona Sarajevo", br. 14/16, 43/16, 19/17, 10/17).

(4) Cijena parkiranja na javnim parkinzima sa naplatom sastoji se iz:

a) troškova pružanja komunalne usluge kontrole i naplate parkiranja od strane davaoca komunalne usluge,

b) troškova održavanja javnih parkinga pod rampom od strane davaoca komunalne usluge,

c) troškova amortizacije stalnih sredstava postavljenih na javnim parking prostorima u vlasništvu davaoca komunalne usluge,

d) troškova amortizacije stalnih sredstava postavljenih na javnim parking prostorima i

infrastrukturnog komunalnog sistema, odnosno dobara u općoj upotrebi koji su u vlasništvu Ministarstva.

e) naknade za unapređenje i investiciono održavanje javnih parkinga od strane Ministarstva.

(5) Pod održavanjem javnih parkinga smatra se čišćenje površine za parkiranje i zimsko održavanje od snijega i leda parkinga pod rampom, čišćenje parkomata od snijega i leda u zimskom periodu, a od prašine i drugih nečistoća u ljetnom periodu.

(6) Raspodjela naknade i konkretna struktura ulaganja u općine definirat će se sporazumom sa svakom općinom posebno.

(7) Cijenu za rezervirano parking mjesto i povlaštenu parking kartu utvrđuje Vlada na prijedlog Ministarstva.

POGLAVLJE VII - MODALITETI FINANSIRANJA IZGRADNJE NOVIH PARKINGA I GARAŽA

Član 36. (Modaliteti finansiranja izgradnje novih parkinga i garaža)

Finansiranje izgradnje novih parkinga i garaža moguće je putem:

- a) privatnog ulaganja,
- b) javno-privatnog partnerstva.
- c) općine,
- d) zajedničkog ulaganja zainteresiranih strana (Ministarstvo, grad i općina),
- e) namjenskih sredstava Ministarstva.

POGLAVLJE VIII - KONTROLA PARKIRANJA NA JAVNIM PARKINZIMA

Član 37. (Ugovor sa davaocem komunalne usluge)

(1) Ministarstvo posebnim ugovorom definiše odnose sa davaocem komunalne usluge.

(2) Ugovor iz st. (1) ovog člana, između ostalog, definiše procentualni iznos ukupnih prihoda koji pripada davaocu komunalne usluge za njegovo pružanje usluga kontrole i naplate parkiranja na javnim parkinzima i obračun poreza na dodatnu vrijednost (PDV).

(3) Ministarstvo će najmanje jednom godišnje, kao i u situaciji promjene značajnijih parametara u procesu pružanja usluga naplate i kontrole parkiranja na javnim parkinzima, vršiti analizu i ocjenjivati opravdanost utvrđenog procenta ukupnih prihoda koji pripadaju davaocu komunalne usluge.

Član 38. (Kontrola parkiranja na javnim parkinzima)

(1) Kontrolu nad svim parkiranim vozilima na javnim parkinzima sa naplatom obavlja kontrolor koji je uposlenik kod davaoca komunalne usluge i kojeg davalac komunalne usluge ovlasti.

(2) Kontrolori imaju službenu legitimaciju, nose službena odijela i koriste se odgovarajućom tehničkom opremom koja omogućuje evidentiranje: mjesta, vremena parkiranja i registarskih oznaka vozila.

(3) Kontrolor naplate parkiranja za vozilo zatečeno bez valjane parking karte na obilježenom parking mjestu sankcioniše vozača izdavanjem doplatne parking karte uz postavljanje kandže, ukoliko vozač nije u periodu od 10 minuta od trenutka parkiranja vozila kupio i istakao valjanu parking kartu.

(4) Izdavanje doplatnih parking karti i postavljanje kandži vrše ovlaštene službene osobe davaoca komunalne usluge.

(5) Davalac komunalne usluge dužan je propisati izgled legitimacije i službenih odijela kontrolora parkiranja internim aktom na koji Ministarstvo daje saglasnost.

(6) Ministarstvo će putem ovlaštenih osoba vršiti nadzor nad radom kontrolora davaoca komunalne usluge.

(7) Ukoliko se utvrdi da kontrolor ne obavlja kontrolu naplate parkiranja u skladu sa ovom uredbom, Ministarstvo će protiv kontrolora podnijeti disciplinsku prijavu davaocu komunalne usluge.

(8) Ukoliko kontrolor vrši kupovinu parking karte na parkomatu u ime korisnika parkinga, vrši težu povredu radne dužnosti.

Član 39. (Nadzor i kontrola nad provođenjem Uredbe)

(1) Upravni nadzor i kontrolu nad provođenjem odredbi ove uredbe i rada davaoca komunalne usluge parkiranja vrši Ministarstvo.

(2) Poslove inspeksijskog nadzora nad primjenom ove uredbe obavljat će Kantonalna Uprava za inspeksijske poslove Kantona - Inspektor za puteve i komunalna inspekcija nadležnih općina.

POGLAVLJE IX - KAZNENE ODREDBE

Član 40.

(1) Korisnik parkinga kažnjava se doplatnom parking kartom u iznosu koji odredi odlukom Vlada ukoliko ne postupi u skladu sa odredbama člana 28. st. (1) i (2) ove uredbe.

(2) Ukoliko korisnik ne izvrši uplatu doplatne parking karte za skidanje kandže iz st. (I) ovog člana i učini povredu člana 16. st. (1) tač. (a), (b), (c) i (d), korisnik parking mjesta sankcionisat će se odnošenjem vozila specijalnim vozilom "pauk", a naknada za odvoz vozilom "pauk" bit će određena odlukom Vlade.

(3) Za učinjeni prekršaj iz člana 16. st. (1) tač. (a) i (e) kaznit će se fizičko lice kaznom u iznosu od 50,00 KM.

POGLAVLJE X - PRIJELAZNE I ZAVRŠNE ODREDBE

Član 41. (Započeti postupci)

Postupci koji su započeti prije donošenja ove uredbe okončat će se prema odredbama ove uredbe.

Član 42. (Prelazna rješenja)

U periodu dok tehnički uslovi ne budu omogućili automatsku naplatu uz stalnu softversku kontrolu naplate (parkinzi sa rampom) davaoc komunalne usluge dužan je vršiti dostavljanje izvještaja o ostvarenim ukupnim prihodima po postojećem načinu rađa, a prikupljena novčana sredstva uplaćivati na otvoreni namjenski račun Ministarstva.

Član 43. (Upravni spor)

Protiv upravnih akata Ministarstva može se izjaviti žalba Vladi.

Član 44. (Sklapanje ugovora)

Ugovor sa davaocem komunalne usluge iz člana 38. ove uredbe Ministarstvo zaključuje u roku od 30 dana od dana stupanja na snagu ove uredbe.

Član 45. (Gramatička terminologija)

Gramatička terminologija korištenja muškog ili ženskog spola podrazumijeva oba spola.

Član 46. (Prestanak važenja propisa)

Danom stupanja na snagu ove uredbe prestaje primjena: Uredbe o organizaciji i načinu naplate parkiranja na području Kantona Sarajevo ("Službene novine Kantona Sarajevo", br. 25/16 i 19/17 - Ispravka), Odluke o zonama javnih parkirališta ("Službene novine Kantona Sarajevo", br. 8/17) i Odluke o cijenama parking karte ("Službene novine Kantona Sarajevo", br. 8/17, 13/17 - Ispravka i 42/17 - Ispravka).

Član 47. (Stupanje na snagu)

Ova Uredba stupa na snagu osmog dana od dana objavljivanja u "Službenim novinama Kantona Sarajevo".

Broj 02-05-39401-17/18
13. decembra 2018. godine
Sarajevo

Premijer
Adem Zolj, s. r.